



Broj: 01,02,03/11-05-1-735/16
Sarajevo: 30.3.2016.

Izvještaj o posjeti Delegacije PSSEECР-a Evropskom parlamentu

(Izvještaj s koordinacijskog sastanka Delegacije PSSEECР-a i zajedničkog sastanka s članovima Odbora za vanjske poslove Evropskog parlamenta)

Na međunarodnoj konferenciji Parlamentarne skupštine Procesа za saradnju Jugoistočne Evrope (PSSEECР) pod nazivom: “Regionalna sinergija, strateška saradnja i parlamentarna diplomatija”, koja je održana 6. 11. 2015. u Sofiji, donesen je Zaključak o institucionalizaciji saradnje s Evropskim parlamentom. U pogledu institucionalizacije saradnje, Stalni odbor donio je odluku o učešću na sastanku s Odborom za vanjske poslove Evropskog parlamenta u Briselu. Svi parlamenti zemalja članica PSSEECР-a trebali su imenovati svog predstavnika kako bi se uspostavila delegacija koja će učestvovati na sastanku u Briselu. Delegacija Parlamentarne skupštine BiH u Parlamentarnoj skupštini SEECР-a imenovala je Hanku Vajzović.

U skladu s odlukom Stalnog odbora, kabinet predsjedavajuće PSSEECР-a Cecke Čačeve pripremio je Nacrt sporazuma o saradnji između PSSEECР-a i Evropskog parlamenta. Nakon što su dobili Nacrt sporazuma, parlamenti su dostavili primjedbe, a zatim je Parlament Bugarske izvještavao o tome koji su amandmani usvojeni a koji nisu. S tim u vezi, predsjednik Državnog zbora Republike Slovenije poslao je otvoreno pismo predsjednici Narodne skupštine Bugarske i predsjednicima parlamenta država članica SEECР-a. U pismu se iznosi stav da način na koji se sad radi Nacrt sporazuma o saradnji nije u duhu postizanja konsenzusa i jedinstva o ključnim pitanjima koje razmatra PSSEECР-a te da Državni zbor Republike Slovenije, nažalost, ne može podržati Nacrt sporazuma donesen prema navedenom postupku. Povodom otvorenog pisma predsjednika Državnog zbora, Delegacija Parlamentarne skupštine BiH u Parlamentarnoj skupštini SEECР-a održala je sjednicu na kojoj je razmotren Nacrt sporazuma o saradnji i doneseni su zaključci s kojima su upoznate sve članice Parlamentarne skupštine SEECР-a.

Neposredno pred odlazak na sastanak u Brisel (18.marta) nacionalni koordinatori obaviješteni su o općim i posebnim elementima saradnje koje je predložio Odbor za vanjske poslove Evropskog parlamenta, a to su:

1. Redovne rasprave o aktuelnim temama kako bi se nadgledao i ubrzao proces pristupanja Evropskoj uniji država članica SEECР-a koje nisu članice EU. To može uključiti godišnju

razmjenu mišljenja s poslanicima PSSEEC-a na jednom od redovnih proljetnih zasjedanja Odbora za vanjske poslove,

2. Ad hoc učešće članova Evropskog parlamenta na događajima PSSEEC-a, uključujući plenarne sesije, rasprave i druge događaje na kojima se razmatraju teme od zajedničkog interesa,
3. Razmjena informacija i ekspertiza između PSSEEC-a i Odbora za vanjske poslove,
4. Pozivanje poslanika PSSEEC-a na događaje (konferencije, seminare itd.) u sklopu programa pomoći Evropskog parlamenta kako bi se pomoglo pretpristupnim državama u njihovim pripremama za članstvo u EU.

Delegacija Parlamentarne skupštine SEEC-a boravila je u Briselu 21. 3. 2016. gdje je održana razmjena mišljenja s Odborom za vanjske poslove Evropskog parlamenta. U skladu s programom posjete Delegacije Parlamentarne skupštine SEEC-a Evropskom parlamentu, uoči zvaničnog sastanka održan je koordinacijski sastanak. Održavanje koordinacijskog sastanka zakazano je da bi se precizirale oblasti i oblici buduće saradnje kao i zbog izražavanja zajedničkih stavova parlamenata Jugoistočne Evrope o razvoju regije i njenim evropskim perspektivama. Na sastanku se razgovaralo o aktuelnim dešavanjima u zemljama članicama Procesu, migrantskoj krizi i borbi protiv terorizma. Predsjedavajuća PSSEEC-a i predsjednica Parlamenta Bugarske Cecka Cačeva je i ovom prilikom ponovila da su prioriteta bugarskog predsjedavanja Parlamentarnom skupštinom SEEC-a nastavak procesa institucionalizacije s Evropskim parlamentom kao i produbljivanje saradnje s Evropskim parlamentom. Izrazila je uvjerenje da će Nacrt sporazuma o saradnji poslužiti kao dobar osnov za razgovor s evropskim kolegama. Naglasila je da je potrebno intenzivnije koordinirati saradnju s obzirom na to da SEEC čine zemlje članice EU, zemlje kandidatkinje i zemlje koje su potencijalne kandidatkinje za članstvo u EU.

Predstavnik Rumunije je na sastanku rekao da aktuelna izbjeglička kriza predstavlja veliki izazov ne samo za EU, nego i cijeli region Jugoistočne Evrope, što zahtijeva koherentnu saradnju i usklađivanje nacionalnih zakonskih normi s propisima EU u ovoj oblasti.

Predstavnik Turske pozdravio je jačanje saradnje sa EP kao i postignuti sporazum između EU i Turske po pitanju izbjegličke krize. Smatra da je potrebna veća transparentnost u radu PSSEEC-a i dodao da postoji potreba pronalaska konsenzusa za uspostavljanje stalnog sekretarijata radi jačanja institucionalnih kapaciteta. Ponovio je da je Turska ponudila punu finansijsku podršku za narednih pet godina uz prijedlog da sjedište bude u Istanbulu.

Predstavnica Bosne i Hercegovine Hanka Vajzović informirala je prisutne o posljednjim dešavanjima kada su u pitanju evropske integracije BiH, odnosno o predaji zahtjeva za članstvo Bosne i Hercegovine u EU 15. 2. 2016. Pozdravila je Sporazum o saradnji s EP i naglasila značaj regionalne saradnje za BiH u ovom procesu.

Predstavnik Albanije izrazio je nadu da će pitanje Sekretarijata PSSEEC-a biti uskoro riješeno. Pozdravio je sporazum EU-Turska. Podržao je stav predstavnika Kosova da treba što prije uspostaviti liberalizaciju viznog režima za Kosovo.

Predstavnik Grčke rekao je da je njegova zemlja pored ekonomske krize teško pogođena i izbjegličkom krizom za što EU snosi veliku odgovornost. Dodao je da je potrebno raditi na provođenju sporazuma EU-Turska.

Na kraju koordinacijskog sastanka predsjedavajuća Cačeva zaključila je da se traži poseban oblik saradnje s Evropskim parlamentom s obzirom na postojeće izazove s kojima se suočava EU i region Jugoistočne Evrope, što zahtijeva poseban zajednički pristup u okviru parlamentarne saradnje.

Na redovnom sastanku Odbora za vanjske poslove Evropskog parlamenta razmijenjena su mišljenja o situaciji u regiji i međuparlamentarnoj saradnji s Delegacijom PSSEEC-a koju je predvodila predsjedavajuća Cecka Cačeva.

Na sastanku Odbora za vanjske poslove predsjedavajući Elmar Brok je, između ostalog, naglasio potrebu jačanja saradnje sa PSSEEC-a uz pojačanu koordinaciju kroz Vijeće Evrope i Organizaciju za ekonomsku saradnju i razvoj.

Cačeva je ovom prilikom rekla da dvije institucije moraju intenzivirati saradnju u oblasti gorućih pitanja za EU i Jugoistočnu Evropu. Predstavila je inicijativu Bugarske o uspostavi mehanizma za saradnju između Parlamentarne skupštine SEEC-a i Evropskog parlamenta. U okviru inicijative dvije institucije trebalo bi da rade na zajedničkom dokumentu kojim se definiraju temelji saradnje u ključnim oblastima za region. Saradnja bi prvenstveno bila intenzivirana u oblasti migracijskih politika i borbe protiv organiziranog kriminala. Ekonomska saradnja u regionu, jačanje konkurentnosti i međusobne povezanosti posebno u oblasti energetike i transporta također su dijelovi inicijative koji su od zajedničkog interesa za EU i Jugostočnu Evropu.

Predsjedavajući Elmar Brok zaključio je da je opće raspoloženje da saradnju treba obogatiti. Naveo je da treba ujediniti snage u rješavanju problema i da nam evropska solidarnost mora ležati u srcu, posebno u rješavanju migrantske krize.

Na redovnom sastanku Odbora za vanjske poslove Evropskog parlamenta održana je druga rasprava o Nacrtu izvještaja o Bosni i Hercegovini za 2015.godinu. Izvještaj je pripremio stalni izvjestilac za Bosnu i Hercegovinu Kristian Dan Preda, a u pripremi su učestvovali izvjestioci iz sjene koji dolaze iz ostalih političkih grupa Evropskog parlamenta, kao što su Afzal Khan i Igor Šoltes. Odbor za vanjske poslove pozdravio je zahtjev za članstvo u EU koji je Bosna i Hercegovina uručila predsjedništvu EU 15. 2. 2016. i pozvao Vijeće EU da ga u najskorije vrijeme razmotri. Odbor je također pozvao vlasti u BiH da nastave ustavne, zakonodavne i političke reforme, te da naprave značajan napredak prema EU. Rezolucija o Bosni i Hercegovini usvojena je s 42 glasa "za", 7 "protiv" i 5 glasova "suzdržan". Plenum Evropskog parlamenta će na sjednici 13. i 14. 4.2016. glasati o Rezoluciji.

Tokom rasprave o Nacrtu izvještaja o Bosni i Hercegovini gđa Vajzović imala je kratke bilateralne susrete s članovima Evropskog parlamenta: Kristianom Dan Predom, Afzalom Khanom, Igorom Šoltesom i Eduardom Kukanom. Članovi Evropskog parlamenta naglasili

su da daju podršku reformskim procesima u BiH i poželjeli joj uspjeh na putu za članstvo u EU.

Izveštaj pripremila:

Jadranka Radović

Izveštaj odobrila:

članica Delegacije PSBiH u PSSEECp-a

Hanka Vajzović

Dostaviti:

- Kolegiju Doma naroda Parlamentarne skupštine BiH
- Kolegiju Predstavničkog doma Parlamentarne skupštine BiH
- Kolegiju Sekretarijata Parlamentarne skupštine BiH
- Komisiji za vanjske poslove Predstavničkog doma
- Sektoru za odnose s javnošću
- a/a